



XUNTA DE GALICIA

CONVENIO DE COLABORACIÓN ENTRE A CONSELLERÍA DE ECONOMÍA, EMPREGO E INDUSTRIA DA XUNTA DE GALICIA E A AGRUPACIÓN EUROPEA DE COOPERACIÓN TERRITORIAL GALICIA-NORTE DE PORTUGAL PARA O DESENVOLVEMENTO DA ACTIVIDADE DE COORDINACIÓN DO EURES TRANSFRONTEIRIZO GALICIA-NORTE DE PORTUGAL

En Santiago de Compostela, a 30 de abril de 2018

REUNIDOS

Dunha parte, D. _____, Conselleiro de Economía, Emprego e Industria da Xunta de Galicia, en nome e representación da consellería, en virtude do Decreto 148/2016 do 13 de novembro, do seu nomeamento e intervindo no exercicio das facultades que lle confire o artigo 34 da Lei 1/1983, do 22 de febreiro, reguladora da Xunta e da súa Presidencia.

Doutra parte, D. _____, Director da Agrupación Europea de Cooperación Territorial Galicia-Norte de Portugal, en diante GNP, AECT, designado por despacho conxunto do presidente da Xunta de Galicia e do presidente da Comissão de Coordenação e Desenvolvimento Regional do Norte de Portugal, do 20 de xaneiro de 2017, en nome e representación da dita organización.

Interveñen en función dos seus respectivos cargos e, no exercicio das facultades que para convir en nome das entidades que representan teñen conferidas e,

EXPOÑEN

Primeiro. O Decreto 135/2017, do 28 de decembro, polo que se establece a estrutura orgánica da Consellería de Economía, Emprego e Industria, así como o Decreto 146/2016, do 13 de novembro, polo que se establece a estrutura orgánica da Xunta de Galicia; establecen que a Consellería de Economía, Emprego e Industria é a consellería a quen lle corresponde, de conformidade co Estatuto de Autonomía e coa Constitución, propoñer e executar as directrices xerais do goberno no ámbito laboral, que engloba as competencias en materia de políticas activas de emprego, política laboral, relacións laborais e seguridade e saúde laboral, responsabilidade social empresarial, cooperativas e outras entidades de economía social, orientación e promoción laboral.



Que polo Real Decreto 1375/1997, do 29 de agosto, foi transferida á Comunidade Autónoma de Galicia a xestión realizada polo INEM no ámbito do traballo, emprego e formación, transferencia que foi efectivamente asumida pola Consellería de Economía, Emprego e Industria en virtude do Decreto 289/1997, do 9 de outubro, en relación co Decreto 135/2017, do 28 de decembro polo que se establece a súa estrutura orgánica.

Que como consecuencia da transferencia citada, é a Consellería de Economía, Emprego e Industria a través da Dirección Xeral de Orientación e Promoción Laboral, a responsable de levar a cabo as accións de intermediación no mercado de traballo e, en concreto, as relativas á inscrición e rexistro de demandantes de emprego e das ofertas de traballo, rexistro de contratos, autorización de axencias de colocación e Rede EURES.

Dentro da Rede EURES atópase o servizo EURES-Transfronteirizo Galicia-Norte de Portugal, que ten como obxectivo dar resposta ás necesidades de información ligadas á mobilidade fronteiriza de traballadores e empresarios.

Segundo. Que o EURES Transfronteirizo Galicia - Norte de Portugal foi creado con data 15.12.1997 mediante a sinatura dun convenio marco de colaboración entre distintos socios, entre os cales se atopan, entre outros, o Instituto de Emprego e Formación Profesional (Lisboa-Portugal) e a Xunta de Galicia.

O Convenio Marco de colaboración foi ratificado con data de 31.05.2010.

Dito convenio establece en base á Decisión 2003/8/CE da Comisión do 23 de decembro de 2002, entre outros, os seguintes obxectivos:

- Asegurar a circulación de información relativa ás ofertas e demandas de emprego entre as rexións fronteirizas.
- Asegurar a transparencia de información relativa ao mercado de traballo e ás condicións de vida e traballo nestas rexións.

O citado convenio especifica no artigo 1º a necesidade de acadar conxuntamente os obxectivos antes mencionados entre todos os socios e no artigo 5º a preparación dun plan de traballo anual global no que se especifiquen as actividades de cada socio, entre as que se atopan as de coordinación da Rede.

Así mesmo, establece no seu artigo 11º que os Servizos Públicos de Emprego (SPE) rotativamente, sexan os únicos perceptores da contribución da Comisión, conforme ao artigo 10º e que procedan á distribución dos fluxos financeiros entre os respectivos socios.



É por isto que, a Consellería de Economía, Emprego e Industria, responsable da xestión das accións transferidas anteriormente indicadas e sendo perceptora dos fondos financeiros comunitarios formaliza coa Agrupación Europea de Cooperación Territorial Galicia - Norte de Portugal o presente Convenio para a realización das actividades de coordinación do EURES Transfronteirizo Galicia - Norte de Portugal con arranxo ás seguintes,

CLÁUSULAS

Primeira. O obxecto do presente Convenio é establecer as condicións polas que se rexerá a colaboración entre a Consellería de Economía Emprego e Industria, e maila GNP, AECT, para a realización das actividades de coordinación do EURES Transfronteirizo Galicia - Norte de Portugal que de seguido se detallan, as cales se levan a cabo na oficina de coordinación de Valena (Portugal) do 1 de xaneiro ao 31 de decembro de 2018.

- Actividade “Coordinación da Rede”.
 - Elaborar o Plan de Actividades anual, a partir das achegas dos socios.
 - Elaborar o orzamento anual, a partir das achegas dos socios.
 - Supervisar a implantación e a contabilidade do orzamento da estrutura.
 - Preparar o informe anual da estrutura.
 - Asegurar a calidade e a conformidade da contabilidade e o informe final da estrutura coas regras de EURESco.
 - Axudar aos socios na planificación de accións apropiadas en relación á estratexia definida.
 - Estimular a cooperación e a realización de accións conxuntas, poñendo remedio aos obstáculos á cooperación.
 - Participar no desenvolvemento e implantación de todas e cada unha das accións do Plan de Actividades anual, realizando tamén tarefas de supervisión e control.
 - Promocionar e representar á estrutura xunto coa persoa titular da presidencia do Comité Directivo de EURES-T, non só nas accións desenvolvidas polos organismos socios senón tamén nas desenvolvidas por outros organismos e institucións que solicitan a colaboración de EURES-T Galicia-Norte Portugal.
 - Organizar as reunións dos grupos de traballo específicos, promovidos polos SPE de Galicia e Portugal.
 - Promover e organizar os encontros do persoal dos SPE de Galicia e Portugal.
 - Estimular as sinerxías con outros programas comunitarios, organismos e institucións.
 - Asegurar a promoción de EURES entre os responsables xerárquicos dos conselleiros EURES e a súa implicación.
 - Manter contacto cos servizos centrais dos organismos socios.



- Planificar e poñer en marcha as accións de formación interna.
- Proporcionar apoio á rede de conselleiros EURES, facilitando o contacto con outros organismos e institucións (S. Social, Inspección de Traballo, Finanzas, etc.) e buscar solucións ás necesidades de información solicitadas por eles.
- Asistir ao Comité Directivo na dirección e control da implantación das actividades aprobadas, preparar as reunións do Comité Directivo e contribuír á aplicación das decisións tomadas.
- Atención ao público (demandantes de emprego, empregadores) dando información sobre dereitos e obrigas no ámbito laboral transfronteirizo.
- Asistir aos conselleiros EURES de Galicia e Norte de Portugal na busca de información sobre dereitos e obrigas no ámbito laboral transfronteirizo.

Segunda. A achega financeira ao citado Convenio, no que atinxe á Consellería de Economía, Emprego e Industria, establécese en setenta e tres mil seiscentos euros con vinte e cinco céntimos 73 600,25 € e realizarase con cargo á aplicación orzamentaria 09.41.322A.491.1 (Proxecto: 2016 00413 “EURES”). Dita cantidade correspóndese co 100% da contía orzada para o desenvolvemento das actividades que figuran no Convenio VS/2017/0392.

A execución dos pagos derivados deste convenio realizarase utilizando a fórmula de pagos a conta, o que suporá a realización de pagos fraccionados que responderán ao ritmo de execución das accións subvencionadas.

Así mesmo, tense previsto facer efectivo, logo de solicitude por parte da entidade, un pago en concepto de anticipo por importe de 19 900,00 €. En todo caso, e tal e como está previsto no artigo 62 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, o importe conxunto dos pagos a conta e do pago anticipado non poderán ser superiores ao 80% da porcentaxe subvencionada correspondente aos pagos xustificados, nin excederá da anualidade prevista en cada exercicio.

En ningún caso a Consellería de Economía, Emprego e Industria aboará custo ningún que exceda da dita cantidade.

Terceira. A GNP, AECT deberá xustificar a realización das actividades conveniadas mediante a presentación de conta xustificativa, coa achega das facturas ou documentación acreditativa do gasto realizado xunto cos documentos de pago correspondentes nos termos que establece o artigo 48 do Decreto 11/2009, do 8 de xaneiro, polo que se aproba o regulamento da Lei 9/2007, do 13 de xuño, de subvencións de Galicia. Para o suposto de que os gastos efectuados foran menores que a achega da Consellería, esta minorarase polo importe desa diferenza. Excepcionalmente poderán aboarse gastos realizados no mes de decembro nos que non resulte posible achegar a xustificación do seu pagamento dentro do exercicio. Nestes casos o pagamento deberá



xustificarse dentro do mes de xaneiro inmediato seguinte, procedéndose en caso contrario ao reintegro das contías correspondentes.

Serán computados como gastos realizados os aprobados segundo o Convenio VS/2017/0392 cando estes estean xustificadas segundo as normas establecidas no regulamento financeiro aplicable ao orzamento xeral das Comunidades Europeas (FOR) e as súas regras de aplicación (RAP).

Cuarta. De acordo co establecido no artigo 65.4.h) do Decreto 11/2009, do 8 de xaneiro, polo que se aproba o regulamento da Lei 9/2007, do 13 de xuño, de subvencións de Galicia, en relación cos artigos 62.3, 67 do mesmo corpo legal, quedan exonerados da constitución de garantías “as entidades non lucrativas, así como as federacións, confederacións ou agrupacións destas, que desenvolvan proxectos ou programas de acción social ou cooperación internacional”.

Quinta. Os gastos nos que se incorra para o desenvolvemento destas accións, poderanse imputar a este convenio dende o día 1 de xaneiro de 2018 ata a data de remate da vixencia do mesmo.

A Consellería de Economía, Emprego e Industria resérvase o dereito de solicitar toda a documentación que considere precisa, en relación coa xustificación económica.

A vixencia do presente Convenio de Colaboración, estenderase dende o día da súa sinatura ata o 31 de decembro de 2018.

Sexta. A GNP, AECT estará suxeita ás seguintes obrigas:

- a) Comunicarlle ao órgano que concede a subvención calquera modificación das condicións tidas en conta para a concesión da subvención, así como dos compromisos e obrigas asumidos e, de ser o caso, a obtención concorrente de subvencións ou axudas para a mesma finalidade procedentes de calquera Administración ou ente público nacional ou internacional.
- b) O sometemento ás actuacións de control, comprobación e inspección que efectuará a Consellería de Economía, Emprego e Industria, ás de control financeiro que correspondan, se é o caso, á Intervención Xeral da Comunidade Autónoma, ás previstas na lexislación do Tribunal de Contas e do Consello de Contas, ou a outros órganos da Administración do Estado ou da Unión Europea.
- c) Conservar os xustificantes da realización das actividades deste convenio, así como da aplicación dos fondos recibidos. O prazo será o establecido no artigo 140 do Regulamento UE 1303/2013 do Parlamento Europeo e do Consello polo que se



establecen disposicións comúns relativas a FEDER, FSE, FC, FEADER e FEMP, disposicións xerais relativas a FEDER, FSE, FC e FEMP e se derroga o Regulamento CE 1083/2006 do Consello.

- d) Dispoñer dos libros contables, rexistros dilixenciados e demais documentos debidamente auditados nos termos esixidos pola lexislación mercantil e sectorial aplicable ao GNP, AECT coa identificación en conta separada ou epígrafe específico da súa contabilidade de todos os ingresos e gastos de execución das accións realizadas.

Sétima. A GNP, AECT para poder obter a condición de beneficiario deberá cumprir os requisitos establecidos no artigo 10 da Lei 9/2007, do 13 de xuño, de subvencións de Galicia e no Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.

A GNP, AECT estará suxeita ao cumprimento das obrigas recollidas no artigo 11 da citada Lei 9/2007, do 13 de xuño, de subvencións de Galicia e no Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.

Oitava. A GNP, AECT presta o seu consentimento á Consellería de Economía, Emprego e Industria para incluír e facer públicos os datos relevantes referidos ás axudas recibidas, así como ás sancións impostas, nos rexistros públicos de axudas, subvencións e convenios e de sancións administrativas, regulados no Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006 (DOG núm. 153, do 9 de agosto). Os dereitos de acceso, rectificación, cancelación e oposición de datos de carácter persoal poderán exercerse ante a Secretaría Xeral Técnica da Consellería de Economía, Emprego e Industria, mediante o envío dunha comunicación ao seguinte enderezo: Consellería de Economía, Emprego e Industria, Secretaría Xeral Técnica, Edificio Administrativo San Caetano, 15781 Santiago de Compostela; ou a través dun correo electrónico a lopd.industria@xunta.gal.

A Consellería de Economía, Emprego e Industria publicará na súa páxina web oficial a realización do presente convenio coa GNP, AECT e o importe da axuda concedida.

Novena. Toda alteración das condicións tidas en conta para a concesión de axudas ou subvencións, así como a obtención concorrente de axudas outorgadas por outras administracións ou outros entes públicos ou privados, nacionais ou internacionais, poderá dar lugar á modificación da resolución de concesión e, eventualmente, a súa revogación.



Décima.- Procederá a revogación da axuda, así como o reintegro total ou parcial das cantidades e a esixencia de xuro de demora, nos casos e termos previstos na Lei 9/2007, do 13 de xuño, de subvencións de Galicia e no Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.

A obriga do reintegro establecida no parágrafo anterior enténdese sen prexuízo do establecido no Real decreto lexislativo 5/2000, do 4 de agosto, polo que se aproba o texto refundido da Lei sobre infraccións e sancións na orde social.

Décimo primeira. A subscripción deste convenio de colaboración non leva relación laboral contractual ou de calquera outro tipo entre os profesionais que vaian desenvolver as actividades e a Consellería de Economía, Emprego e Industria. A GNP, AECT non ten responsabilidades máis alá das derivadas da súa xestión desta labor de coordinación.

Décimo segunda. A duración deste convenio será dende o día da súa sinatura ata o día 31 de decembro de 2018, podéndose denunciar pola parte que considere vulnerado o seu espírito por incumprimento dalgunha das súas cláusulas. O prazo máximo de presentación por parte dos beneficiarios da documentación xustificativa será o 31 de decembro de 2018.

O presente convenio poderá prorrogarse anualmente, antes da súa finalización, e por un período máximo de un ano, por mutuo acordo das partes, de conformidade co previsto no artigo 16 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de Subvencións de Galicia.

A denuncia terá que efectuarse mediante comunicación á outra parte, por escrito fundado e cunha antelación mínima dun mes. Agás acordo expreso en contrario, teranse que rematar as accións xa iniciadas.

Décimo terceira. Correspóndelle á Comisión creada para o efecto o seguimento e interpretación das dúbidas que se presenten. Formarán parte da mesma dous membros designados por cada unha das partes.

Este convenio terá carácter administrativo. No caso de persistir as dúbidas ou controversias despois de reunida a Comisión Mixta, estas serán resoltas pola Consellería de Economía, Emprego e Industria. A xurisdición competente, de ser o caso, será a contencioso-administrativa.

Décimo cuarta. As accións subvencionadas previstas neste convenio son incompatibles coa percepción doutras subvencións, axudas, ingresos ou recursos para a mesma finalidade, procedentes de calquera Administración ou entes públicos ou privados, nacionais, da Unión Europea ou de organismos internacionais.



XUNTA DE GALICIA

Décimo quinta. O incumprimento dalgunha das cláusulas do convenio será causa bastante para a súa denuncia. Neste caso, feita a denuncia por calquera das partes quedará en suspenso a actividade obxecto de convenio e por ende das respectivas obrigas, sen que iso orixine unha ampliación do prazo convindo.

E en proba de conformidade, asinan este convenio de colaboración por triplicado exemplar, no lugar e data indicados no encabezamento.

POLA CONSELLERÍA DE
ECONOMÍA, EMPREGO E INDUSTRIA

POLA AGRUPACIÓN EUROPEA
DE COOPERACIÓN TERRITORIAL
GALICIA-NORTE DE PORTUGAL